

王勃集卷上

賦

春思賦

并序

咸亨二年余春秋二十有二旅寓巴蜀浮遊歲序殷憂明時坎壈聖代九隴縣令河東柳大易英達君子也律從遊焉高談智懷頗洩憤懣于時春也風光餘然古人云風景未殊舉目有山河之異不其悲乎僕不才耿介之士也竊稟宇宙獨用之心受天地不平之氣雖弱植一介窮途千里未嘗下情於公依屈也於流俗凜然全

石自匹猶不能忘情於春則知春之所及遠矣  
春之所感深矣此僕所以撫窮賤而惜先陰懷  
功名而悲歲月也豈徒幽宮狹路陌上桑間而  
已哉屈平有言極千里傷春心因作春思賦庶  
幾乎以極春之所至析心之去就云爾

若夫年臨九域韶光四極解宇宙之嚴氣起亭  
臯之春色况風景兮同序復江山之異國感大  
運之虛盈見長河之紆直蜀川風侯隔秦川今  
年節物異常年霜前柳葉銜霜翠雪裏梅花犯  
雪妍霜前雪裏知春早看柳看梅覺春好思萬

里之佳期憶三秦之遠道淡蕩春色悠揚懷抱  
野何樹而無花水何堤而無草於是僕本浪人  
平生自淪懷書去洛抱劒辭秦惜良會之道邁  
厭他鄉之苦辛忽逢邊候改遙憶帝鄉春帝鄉  
迢遞關河裏神臯欲暮風烟起黃山半入上林  
園玄灞斜分曲江水玉臺金闕紛相望千門萬  
戶遙相似昭陽殿裏報春歸未央臺上看春暉  
水精却掛鴛鴦幔雲母斜開翡翠幃競道西園  
梅色淺爭知北闕柳陰稀斂態調歌扇迴身正  
舞衣銀蠶吐絲猶未暖金燕銜泥試學飛妾本



幽閨學歌舞寧知漢代多巡撫前年齋祭謁甘  
泉今歲笙簫祠后土桃花萬騎喧長薄蘭葉千  
旗照平浦見原野之芳春憶山河之邃古長安  
路狹遠長安公子春來不厭看杏葉裝金轡蒲  
萄縷玉鞍聳蓋臨平樂迴笳出上蘭上蘭經鄠  
杜揮鞭日將暮白馬新臨御溝道青牛近出章  
臺路章臺接建章垂柳復垂楊草開馳馬埒花  
滿闌雞塲南隣少婦多妖婉比里王孫駐行幘  
乍怪前春節候遲預道今年寒食晚傷紫陌之  
春度惜青樓之望遠紫陌青樓照月華珠帷繡

帳七香車蛾眉畫來應幾樣蟬鬢梳時欲斜

恨雕鞍之屆晚痛銀箭之更賒行行避葉步步

看花因狂夫之蕩子成賤妾之倡家狂夫去去

一作無窮已賤妾春眠春未起自有蘭閨數十

重安知榆塞三千里榆塞連延玉關側雲間沉

沉不可識葱山隱隱金河北霧裏蒼蒼幾重艷

忽有驛騎出幽并傳道春衣萬里程龍沙春草

遍瀚海春雪生踈勒井泉寒尚竭燕山烽火夜

應明聞道河源路遠遠誰知夫婿苦行行君行

塞外多霜露爲想春臺起烟霧遊絲空罥合歡



枝落花自遠相思樹春望年年絕幽閨離緒切  
春色朝朝異邊廷羽書至都護新封萬里侯將  
軍稍定三邊地長旆猶銜掃雲色寶刀尚擁千  
星氣昨夜祁連驛使還征夫猶住鴈門關君度  
山川成白首應知歲序歇紅顏紅顏一別成胡  
越夫婿連延限城闕羌笛橫吹隴路風戎衣直  
照關山月春色徒盈望春悲殊未歇復聞天子  
幸關東馳道煙塵萬里紅析羽搖初日繁笳思  
曉風後騎猶分長樂館前旌已映洛陽宮洛陽  
宮城紛合沓珠翠中閨盛綺羅鳳移金谷舞鶯

引石城歌向夕天津洛橋暮爭驅紫燕黃牛度  
閑居伊水園舊宅邛山路武子新布金錢埒季  
倫欲 珊瑚樹復道西墉春霧寡更值南津春  
望寫入金市而乘羊出銅街而試馬草犯春而  
爭密花牽風而亂下錦障縈山羅幃照野司空  
令尹之博物二陸三張之文雅新年栢葉之樽  
上巳蘭英之掌春來併是春何啻兩違秦忽逢  
江外客復憶江南春羅衣乘北渚錦袖出東隣  
江邊小婦無形迹特怨狂夫事行役鳳凰山上  
花無數鸚鵡洲中草如積春江淡容與春期無



處所春水春魚樂春汀春鴈舉君道玉門關何  
如金陵渚爲問逐春人年光幾處新年春不  
至何地不宜春亦有當春逢遠客亦有當春別  
故人風物雖同候悲歡各異倫歸去春山恣閑  
放蕙畹蘭皋行可望何爲悠悠坐惆悵比來作  
客住臨邛春風春日自相逢石鏡巖前花屢密  
玉輪江上葉頻濃高平灞岸三千里少道梁山  
一萬重自有春花煎別思無勞春鏡照愁容盛  
年耿耿辭鄉國長路遙遙不可極形隨朗月驟  
東西思逐浮雲幾南北春蝶參差命儔侶春鶯

綽羸思羽翼余復何爲此方春長嘆息會當一  
舉絕風塵翠蓋朱軒臨上春朝昇玉署調天紀  
夕憇金閨奉帝綸長卿未達終希達曲逆長貧  
豈剩貧年年送春應未盡一歲逢春自有人

七夕賦

若夫乾靈鵠識之端地輔龍驂之始憑紫都而  
受曆按玄丘而命紀鳳毛鍾桂闔之祥麟角燦  
椒庭之祉馳朱軒於九域振黃麾於萬里抗芝  
館而星羅擢蘭宮而霞起則有皇慈霧洽聖渥  
天浮庭分玉禁邸瞰金樓翦鳧洲於細柳披鶴



籞於長楸啓魚鈴而分帝術授虹壁而控神州  
擁黃山於石磴洩玄灞於銅溝列瑤囿而送煥  
闕銀榜而迎秋君王乃排青槐搖朱舄戒鷓鴣  
靜鸞掖繞震廊而轉步僚雲阡而縱跡嘯陳客  
於金牀命淮仙於桂席翔翠罕於金甸迎吹簫  
於鳳驛佇靈匹於星期眷神姿於月夕干時玉  
繩湛色金漢餘光煙淒碧樹露濕銀塘視蓮潭  
之變彩見松院之生涼引驚蟬於寶瑟宿蘭燕  
於瑤筐綠壺兮干仞絕樓兮百常拂花筵而慘  
惻披葉序而佯狂結遙情於漢陌飛永睇於霞

莊想佳人兮如在怨靈歡兮未揚促遙悲於四  
運味遺歌於七襄於是虬簷晚靜魚扃夜飾忘  
帝子之光華下君王之顏色握犀管展魚牋顧  
執事招仲宣仲宣跪而稱曰臣聞九變無律三  
靈有作布元氣於浩蕩運太虛於寥廓辨河鼓  
於西墀降天孫於東堦循五緯而清黃道正三  
衡而澄紫落海人支石之機江女穿針之閣鄙  
塵情於春念擬仙契於秋諾河光清地紀山氣  
斂天標霜凝碧宙水瑩丹青耀麟軒於霧術塞  
羽旆於星橋徵赤螭而架渚漾青翰而乘潮停



翠梭兮卷霜縠引駕杵兮割冰綃舉黃花而乘  
月艷籠黛葉而卷雲翹撫今情而恨促指來渚  
而傷遙旣而丹軒黃拱紫房朱籥仙御透遲靈  
徒擾弱風驚雨驟煙迴電爍媧皇召巨野之龍  
莊叟命雕陵之鵲駐麟駕披鸞幕奏雲和汎霞  
酌碧虬玉室之饌白兔銀臺之藥荷葉頰鮫芙  
蓉孔雀上元錦書傳寶字王母瓊箱薦金約綵  
襟魚頭比目縱香緘燕尾同心縛羅帳五花懸  
珉砌百枝然下芸幃而暱枕弛蘭服而交筵託  
新歡而密勿懷徃春而潺湲於是羈鸞切鏡放

鶴驚絃悲侵玉履念起金鈿儼歸裝而容曳整  
還蓋而遷延洞庭波兮秋水急關山晦兮夕露  
連謂河漢之無浪似參商之永年君王乃背彤  
砌陟玄室冲想自閑神情如逸痛靈妃之稀偶  
喜沉思之可畢荆艷齊升燕佳並出金聲玉貌  
蕙心蘭質珠櫳綺檻比風臺繡戶雕窓南向開  
響曳紅雲歌面近香隨白雪舞腰來掩清琴而  
獨進凌絳樹而輕迴盧女黃金之枕張家碧玉  
之杯奉君王於終夕夫何怨於良媒俄而月還  
西漢霞臨東沼鳧氏鳴秋雞人唱曉玉關控鶴



瓊林飛鳥君王乃馭風殿而長懷俯雲臺而自  
矯矜雅範而霜高穆冲衿而霞眇迎十客召三  
英香溼蔗耐吹肅蘭旌娃館踈兮綠草積歡房  
寂兮紫苔生從詞源於月徑披翰藪於雲扃方  
絕元凱而高視與梁楚而駢聲

九成宮東臺山池賦

并序

九成宮東臺地接開曠面山臨水爾其松峯桂  
壑紅泉碧磴金石千聲雲霞萬色侍郎張公雅  
思沉鬱永懷梓匠式侔仙造聿構靈廡織波成  
止水之源拳石儼干霄之狀雖流波覆篔簹俯籍

人機而布葉攢花眇同天會僕因暇日濫奉清  
埃敢抽南畝之才聊叙東山之事云爾

若夫金臺妙境玉署仙居酌丹池之曉暇候清  
禁之宵餘驟冲情於月道飛駿賞於烟墟指山  
楹而思逸懷水鏡而神虛旣而仰瞻赤嶠傍窺  
黛壑複嶂烟迴攢溪霧錯偉所用之兼濟想神  
宮之可作規疊巘于盤龍憲飛泉於挂鶴覆篔  
簹而縈巖澄浮芥而環川嶸採拳石於溪濱牽纖  
珠於綺薄萍徙楚江之帶花轉崑墟之萼岫蘊  
玉而虹驚浦涵珠而星落美仁智之同歸信高



深之縱託爾其扈岑漏景曲渚留寒高松偃鶴  
清篠鳴鸞被蘭丘而結珮照連服而披冠激坳  
堂於別渚引膚寸於危巒若乃嶺橫雜秀波連  
鳳液花鳥縈紅蘋魚漾碧綠衣玄袵頽鱗翠額  
在林藪而同歡望江湖而齊適及夫景沉西山  
月下東濱峯深夜久潭靜秋新荷抽水蓋薜引  
山茵雪芝獻液露菊傾津嗣南商之逸興有東  
海之遐賓保林泉而肆賞混簪紱而同塵何濯  
纓之有地如攀桂之無因

寒梧棲鳳賦

以孤清夜  
月爲韻

鳳兮鳳兮來何所圖出應明主言棲高梧梧則  
嶧陽之珍木鳳則丹穴之靈雛理符有契誰言  
則孤遊必有方駭南飛之驚鵲音能中呂差入  
夜之啼鳥况其靈蕭散節物凄清踈葉半殞  
高歌和鳴鳥也將託其宿止人也焉知乎此情  
月照孤影風傳暮聲將振耀其五色俟簫韶之  
九成九成則那率舞而下懷彼衆會罔知淳化  
雖璧沼可飲更能適於醴泉雖瓊林可棲復憶  
巡於竹樹念是欣往敢忘晝夜何安安而能遷  
則思其不暇故當披拂寒梧翻然一發自此西



序言投此闕若用之銜詔冀宣命於軒堦若使  
之遊池庶承恩於歲月可謂擇木而俟處卜居  
而後歇豈徒比跡於四靈常棲棲而沒沒

曲江孤鳧賦 并序

梓州之東南涪江之所合有潭焉周數十步青  
壁絕地綠波澄天常有孤鳧栖蕩其側飛沉翻  
唼而天性不違嗟乎宇宙之容我多矣造化之  
資我厚矣何必處華池之內而求稻梁之思哉  
遂作賦曰

靈鳳翔兮千仞大鵬飛兮六月雖憑力而易舉

終候時而難發不如深潭之鳥焉順歸潮而出  
沒迹已存於江漢心非繫於城闕吮紅藻翻碧  
蓮刷霧露棲雲煙迫之則隱馴之則前去就無  
失浮沉自然爾乃忘機絕慮懷聲弄影乘駭浪  
而神驚漾澄瀾而趣靜耻園雞之戀促悲塞鴻  
之赴永知動息而多方屢汭洄而自省故其獨  
泛單宿全真遠致反覆幽溪淹留勝地傷雲鴈  
之嬰繳懼泉魚之受餌甘辭稻梁之惠焉而全  
飲啄之志也

馴鳧賦



海上兮雲中青城兮絳宮金山之斷鶴玉塞之  
驚鴻謂江湖之漲不足聒謂宇宙之路不足窮  
終銜石矢坐傷金籠聲酸夕露影怨秋風已矣  
哉何氣高而望闕卒神瘁而智癢徒驚迹於仙  
遊竟纏機於俗網未若茲禽猶融泛想慙丹丘  
之麗質謝青田之逸響與道浮沉因時俯仰去  
非內懼馴非外獎夫勁翮揮風雄姿觸霧力制  
烟道神周天步鬱霄漢之弘圖受園庭之近顧  
質雖滯於城闕策已成於雲路陳平負城之居  
韓信昌平之寓似達人之用晦混塵蒙而自託

類君子之含道處蓬蒿而不忤悲授餌之徒懸  
痛開絃之自落故爾放懷於誕暢此寄心於寥  
廓

遊廟山賦 并序

玄武山西有廟山東有道君廟蓋幽人之別府  
也長蘿巨樹梢翳雲日王子馭風而遊泠然而  
喜益懷霄漢之舉而忘城闕之戀矣因欲攀洪  
崖於烟道邀羨門於天路仙師不存壯志徒爾  
俄而泉石移景秋陰方積松栢群吟悲聲四起  
背鄉關者無復四時之策焉嗚呼有其志無其



時則知林泉有窮路之哭烟霞多後時之難不  
其悲乎遂作賦曰

陟彼山阿積石峩峩亭臯千里傷如之何啓松  
崖之密蔭攀桂岳之崇柯隔浮埃於地絡披顛  
氣於天羅爾其綠巖分徑蒼岑對室茵軒丹紉  
芝塲翠密俯泉石之清泠臨風飈之瑟颺仰紺  
臺而携手望玄都而容膝於是瀟霞同於玉砌  
步雲岳於金壇懷妙童與真女想青螭及碧鸞  
情恍恍而將逸心迥迥而未安見丹房之晚晦  
知紫洞之宵寒旣而霞昏千嶂煙浮四野恨流

俗之情多痛飛仙之術寡驅逸思於方外扇高  
情於天下使蓬瀛可得而宅焉何必懷於此都  
也亂曰已矣哉吾誰欺林壑逢地烟霞失時託  
宇宙兮無日俟鸞虬兮未期他鄉山水祗令人  
悲

澗底寒松賦 并序

歲八月壬子旅遊於蜀尋茅溪之澗深蹊絕磴  
人跡罕到爰有松焉冒霜停雪蒼然百丈雖高  
柯峻穎不能踰其岸嗚呼斯松託非其所出類  
之器何以別乎蓋物有殊類而合情士有因感



而成興遂作賦曰

惟松之植于澗之幽盤柯跨嶮杳抵憑流寓天地兮何日凌霜露兮幾秋見時華之屢變知俗態之多浮故其磊落殊狀森梢峻節紫葉吟風蒼條振雪嗟英鑒之稀遇保真容之未缺攀翠嶧而形疲指丹青而望絕已矣哉蓋用輕則資衆器宏則施寡信棟梁之已成非椽桷之相假徒志遠而心屈遂才高而位下斯在物而有焉余何爲而悲者

慈竹賦 并序

廣漢山谷有竹名慈生必向內示不離本修莖巨葉攢根杳柢叢之大者或至百千株焉而縈結踰乎咫尺好事君子徒爲堦庭之翫焉吁嗟非此土所有乃有厭流俗之譏動鄉關之思者蓋撫高節而興嘆覽嘉名而思歸遂爲賦曰  
有竹猗猗生于高陂左連瑤帶右雜瓊枝恨幽客之方賞嗟君侯之不知徒蔚丹谷遷容綠池氣凜凜而猶在色蒼蒼而未離屈巖壑之容貌充堦庭之羽儀爾其劃疆分域駢陰抗趾疊幹龍迴攢根鳳峙防碧露於宵末翳紅光於習始



崇柯振而雲靄生繁葉動而風飈起擁京砌之  
晨蕭屏炎扃之晝滓至若白藏載謝玄英肇切  
塞北河堅關南地裂觀衆茂之咸悴驗貞輝之  
獨潔抽勁綠以垂霜總嚴青而負雪蓋同類之  
常稟非殊方之異節若乃宗生旅茂天長地久  
萬柢爭盤千株競斜如母子之鈎帶似閨門之  
悌友恐孤秀而成危每群居而自守付美名之  
天屬而和氣之資受嗟乎道之存矣物亦自有  
不肯仁以貪地不藏節以遁時故其貞不自眩  
用不見疑保夷險之無易晒榮枯之有期我蓬

轉於岷徼遂萍流於江汜分兄弟於兩鄉隔晨  
昏於萬里撫貞容而骨愧伏嘉號而心死庶因  
感而長懷將策情而勵已

青苔賦 并序

吾之旅遊數月矣憇乎荒澗觀青苔焉緣崖而  
上乃喟然嘆曰嗟乎苔之生於林塘也爲幽客  
之賞苔之生於軒庭也爲庸人之怨斯擇地而  
處無累於物也愛憎從而生遂作賦曰  
若夫桂洲蒼澗松崖祕液繞江曲之寒沙咆巖  
幽之古石汎迴塘而積翠縈脩樹而凝碧契山



客之奇情諧野人之妙適及其瑤房有寂瓊室  
無光菲微君子之砌蔓延君侯之堂引浮青而  
泛露散輕綠而承霜起金鈿之舊感驚玉筋之  
新行若夫弱質綿羃纖滋布濩撒形不用之境  
託跡無人之路望夷險而齊歸在高深而委遇  
惟愛憎之未染何悲歡之詭赴宜其背陽就陰  
違喧處靜不根不蒂無華無影耻桃李之暫芳  
笑蘭桂之不永故順時而不競每乘幽而自整  
採蓮賦并序

昔之賦芙蓉者多矣雖復曹王潘陸之逸曲孫  
鮑江蕭之妙韻莫不權陳麗美粗舉採掇豈所  
謂究厥麗態窮其風謠哉頃乘暇景歷覩衆製  
伏翫累日有不滿焉遂作賦曰

非登高可以賦者唯採蓮而已矣况洞庭兮紫  
沙復瀟湘兮綠水或暑雨兮朝霽乍涼風兮暮  
起黛葉青跼煙周五湖紅葩絳蘂電鑠千里尤  
見重於幽客信作謠於君子爾其珍族廣茂淑  
類博傳一作鮮藻河渭之空曲被沮漳之淪連一作  
灑燭澄灣而爛爛亘修漲之田田豈直水區澤  
國江滄海壘是以吳娃春妍感靈翹於上節悅



瑞色於中年錦帆映浦羅衣塞川飛木蘭之畫  
楫駕芙蓉之綺船問子何去幽潭採蓮已矣哉  
誠不知其所以然賞由物召興以情遷故其遊  
泳一致悲欣萬緒至若金室麗妃璇宮佚女傷  
鳳臺之寂寞厭鸞扇之閑處侍飲南津一作陪  
歡北渚見磯岸之紆直覲旌旄之低舉上苑  
神池芳林御陂樓陰架泚殿彩乘漪張拜洛之  
容衛備橫汾之羽儀簫鼓發兮龍文動鱗羽喧  
兮鷁首移咸靚粧而麗服各分驚而並馳蘋繁  
槩礙荇觸船危視雲霞之沃蕩望林泉之蔽虧

川泱泱兮齒齒積水湛湛兮芙蓉披惜歲時兮  
易暮傷君王兮未知折紺房與紺葯攬紅葩及  
碧枝迴綃裙兮竊獨歡步羅鞵兮私自竒莫不  
驚香悼色畏別傷離復有渚宮年少期門公子  
翠髮蛾眉頰脣皓齒傅粉蘭臺之上偷香椒房  
之裏亦復銜恩激誓佩寵絨愁承好賜之珍席  
奉嬉宴之彩旂繡棟暝兮翠羽帳瑤塘曙兮青  
翰舟攀條拾藥沒波沂流池心寬而藻薄浦口  
窄而萍稠和橈姬之衛吹接榜女之齊謳去復  
去兮水色夕採復採兮荷華秋願承歡而卒歲



長接席而寡仇于時薊北無事關西始樂霧靜  
江垠氛恬海漠寢恠氣於沅湘照榮光於河洛  
殊方異類舞詠相錯王公卿士歌吹並作則有  
侯家瑣第戚里方園穿池灞岸之曲蓄水河陽  
之源隄防谷口島嶼輶轅嘉木畢植靈草具繁  
沉桂北之丹藕擢荆南之紫根鬱萋萋而霧合  
粲曄曄而霞翻泊乎氣徹都鄙景萃川陸麥雨  
微涼梅風淺燠命妖侶於石城嘯娛朋於金谷  
乃使綠珠捧棹青琴理舳樽芳醪藉珍餼沉玉  
潭之瀾漫遶金渠之隈隩石近水而苔濃岸連

山而樹復排芟末而爭遠託蘆間而競逐赴汨  
凌波飛桂振蘿風低綠幹水濺黃螺上客喧兮  
樂未已美人醉兮顏將酡畏蓮色之如臉願衣  
香而勝荷徘徊郢調悽愴燕歌念窮歡於水渌  
誓畢賞於川阿結漢女遂湘娥北溪藥尚密南  
汀花更多恨光景兮不任諧芳馨兮謂何若乃  
南鄢義妻東吳信婦結褵整佩承筐奉箒忽君  
子兮有行復良人兮遠征南討九真百越北戍  
鷄田鴈城念去魂駭相視骨驚臨春渚兮一送  
見秋潭之四平與之子別煙波望絕念子之寒



江山路難水淡淡兮蓮葉紫風颭颭兮荷花丹  
剪瑤帶而猶恨折瓊英而不歡既而緣隈逗浦  
返拽歸櫓暎芳草兮已殘憶離居兮方苦延素  
頸於極漲攘皓腕於袖許惜佳期兮末由徒增  
思兮何補又若侶姬蕩媵命侶招群淇上洛表  
湘臯汝濱望洲草兮翡翠色動浦水兮驪龍文  
願解佩以邀子思塞裳而從君悲時暮愁日曛  
鳴環釧兮響窈窕艷珠翠兮光繽紛憐曙野之  
絳氣愛晴天之碧雲棹巡江而柳拂船向渚而  
菱分撥翠莖以翳景龍朱萼以爲裙挺楫凌

雲流雨散鳴榔絡驛霧罷煙釋狀飛虬之蜿蜿  
若驚鴻之奕奕艇怯奔潮篙憎淺石絲着手而  
偏繞刺牽衣而屢褰廼有貴子王孫乘閑縱觀  
何平叔之符彩潘安仁之藻翰稅龍馬於金堤  
命梟舟於石岸錦纜翻灑銀檣照爛日側光深  
浪驚風沉盼北渚之新贈恣東溪之密尋鴛鴦  
繡彩之文履玳瑁瓊華之寶琴扣舷擊榜吳歛  
越吟溱與洧兮葉覆水淮與濟兮花冒潯值明  
月之夕出逢丹霞之夜臨茱萸歌兮軫妾思芍  
藥曲兮傷人心伊採蓮之賤事信忘情之益寡




雖兆迹於水鄉遂風行於天下感極哀樂聲參  
鄭雅是以緬察谷底窮覽地維北盡豐鎬滂瀟  
南究江沱越沂莫不俟期應節沿濤汎湄薄言  
採之興言服之發文局之嚴什動幽愧之情詩  
使人結眷令人想思宜其色震百草香奪九芝  
棲碧羽之神雀負青艫之寶龜紫秩流記丹經  
祕詞豈徒加繡柱之光彩曄文井之華滋已矣  
哉向使時無其族代乏厥類獨秀上清之境不  
生中國之地學鸞鳳而時來與鸚鵡而間至必  
能使衆瑞彩沒群貺色沮湯武齋戒伊臯延佇

豈俾夫秦童趙僕倡姬艷女狎而翫之擷而採  
之乎時有東鄙幽人西園舊客常陪帝子之輿  
經在天人之籍詠綠竹於風曉賦朱華於月夕  
暑徃寒來忽矣悠哉蓬飄梗逝天涯海際似還  
叩之寥廓同適越之滯滯蕭索窮途飄飄一隅  
昔聞七澤今遇五湖聽菱歌兮幾曲視蓮房兮  
幾株非鄴地之冥語異睢花之歡娛况復殊方  
別域重瀛複嶂虞翻則故鄉寥落許靖則生涯  
惆悵感芳草之及時懼脩名之或喪誓將刻跡  
頽上棲影渭陽枕箕岫之孤石汎磻溪之小塘



食素食兮吸絳芳荷爲衣兮芰爲裳永潔已於  
丘壑長寄心於君王且爲歌曰芳華懼功名  
竒秀兮異植紅光兮碧色稟天地之淑麗承雨  
露之華飾蓮有藕兮藕有枝才有用兮用有時  
何當婀娜花實移爲君含香藻鳳池

王勃集卷上





王勃集卷下

四言古詩

倬彼我系

勃兄勵序

倬彼我系舍弟虢州叅軍勃所作也傷迫乎家  
貧道未成而受祿不得如古之君子四十強而  
仕也故本其情性原其事業因陳先人之迹以  
議出處致天爵之艱難也

倬彼我系出自有周分疆錫社派別枝流居衛  
仕宋臣嬴相劉廼武廼文或公或侯晉曆崩拆  
衣冠擾弊粵自大原播徂江澨禮喪賢隱時屯



道閉王室如燬生人多殪伊我有器思逢其主  
自東施西擇木開宇田彼河曲家乎汾浦天未  
厭亂吾將誰輔伊我祖德思濟九埏不常厥所  
于茲五遷欲及時也天豈願焉其位雖屈其言  
則傳爰述帝制大蒐王道曰天曰人是祖是考  
禮樂咸若詩書具草貽厥孫謀永爲家寶伊余  
小子信慙明哲彼網有條彼車有轍思屏人事  
克終前烈于嗟代網卒余來綫來綫伊何謂余  
曰仕我瞻先達三十方起夫豈不懷高山仰止  
願言毓德啜枝飲水有鳥反哺其聲嗷嗷言念

舊德憂心忉忉今我不養歲月其滔匏俛從役  
豈敢告勞從役伊何薄求卑位告勞伊何來叅  
卿事名存實爽負信愆義靜言遐思中心是愧  
五言古詩

上巳浮江宴韻得陟字

披觀玉京路駐賞金臺陟逸興懷九仙良辰傾  
四美松吟白雲際桂馥青溪裏別有江海心日  
暮情何已

春日宴樂遊園賦韻得接字

帝里寒光盡神臯春望浹梅郊落晚英柳甸驚



初葉流水抽竒弄崩雲灑芳牒清罇湛不空暫  
喜平生接

山亭夜宴

桂宇幽襟積山亭涼夜永森沉野徑寒蕭穆巖  
扉靜竹晦南河色荷翻北潭影清興殊未歸林  
端照初景

詠風

蕭蕭京景生加我林壑清驅煙尋澗戶卷霧出  
山楹去來固無跡動息如有情日落山水靜爲  
君起松聲

懷仙 并序

客有自幽山來者起予以林壑之事而煙霞在  
焉思解纓紱末詠山水神與道超跡爲形滯故  
書其事焉

鶴岑有竒徑鱗洲富仙家紫泉漱珠液玄巖列  
丹葩常希披塵網眇然登雲車鸞情極霄漢鳳  
想疲烟霞道存蓬瀛近意愜朝市賒無爲坐惆  
悵虛此江上華

忽夢遊仙

僕本江上客牽跡在方內寐寤霄漢間居然有



靈對翕爾登霞首依然躡雲背電策驅龍光煙  
途儼鸞態乘月披金帔連星解瓊珮浮識俄易  
歸真魂莫難再寥廓沉遐想周遑奉遺誨流俗  
非我鄉何當釋塵昧

田家三首

阮籍生年懶嵇康意氣踈相逢一飽醉獨坐數  
行書生池聊養鶴閑田且牧猪草生元亮徑花  
暗子雲居倚牀看婦織登壠課兒鋤迴頭尋仙  
子併是一空虛

家住箕山下門枕潁川濱不知今有漢唯言昔

避秦琴伴庭前月酒勸後園春自得中林士何  
忝上皇人

平生唯以樂作性不能無朝朝訪鄉里夜夜遣  
人酤家貧留客久不暇道精麈抽簾特益炬板  
簣更燃爐怕聞飲不足何見有殘壺

六言古詩

雜曲

智瓊神女來訪文君蛾眉始約羅裙初薰歌齊  
曲韻舞亂行分苦向陽臺薦枕何啻得勝朝雲  
七言古詩



秋夜長

秋夜長殊未央月明白露澄清光層城綺閣遙  
相望川無梁北風受節南鴈翔崇蘭委質時菊  
芳鳴環曳履出長廊爲君秋夜擣衣裳織羅對  
鳳凰丹綺雙鴛鴦調砧亂杵思自傷征夫萬里  
戍他鄉鶴關音信斷龍門道路長君在天一方  
寒衣徒自香

採蓮曲 一作採蓮歸

採蓮歸綠水芙蓉衣秋風起浪鳧飛桂棹蘭  
橈下長浦羅裙玉腕輕搖櫓葉嶼花潭極望平

江謳越吹相思苦相思苦佳期不可駐塞外征  
夫猶未還江南採蓮今已暮採蓮花渠今那必  
盡娼家官道城南把桑葉何如江上採蓮花蓮  
花復蓮花花葉何稠疊葉翠本羞眉花紅強如  
頰佳人不在茲悵望別離時牽花憐共蒂折藕  
愛連絲故情無處所新物從華滋不惜西津交  
佩解還羞北海鴈書遲採蓮歌有節採蓮夜未  
歇正逢浩蕩江上風又值徘徊江上月徘徊蓮  
浦夜相逢吳姬越女何丰茸共問寒江千里外  
征客關山路幾重



臨高臺

臨高臺臨高臺遙遙絕浮埃  
瑤軒綺構何崔嵬  
鸞歌鳳吹清且哀  
俯瞰長安道萋萋御溝草斜  
對甘泉路蒼蒼茂陵樹  
高臺四望同佳氣鬱葱  
蔥紫閣丹樓紛照耀  
璧房錦殿相玲瓏東迷長  
樂觀西指未央宮  
赤城映朝日綠樹搖春風  
旗亭百隊開新市  
甲第千甍分戚里  
朱輪翠蓋不勝春  
疊樹層楹相對起  
復有青樓大道中  
繡戶文窓雕綺櫳  
錦衣畫不裝羅帷  
夕未空歌屏朝  
揜翠粧鏡晚窺紅  
爲君安寶髻蛾眉  
罷花叢塵

間狹路黯將暮  
雲間月色明如素  
鴛鴦池上兩  
兩飛鳳凰樓  
下雙雙度  
物色正如此  
佳期那不顧  
銀鞍繡轂盛  
繁華可憐今夜宿  
娼家娼家少  
婦不須顰  
東園桃李片時春  
君看舊日高臺處  
栢梁銅雀生黃塵

滕王閣

滕王高閣臨江渚  
珮玉鳴鸞罷歌舞  
畫棟朝飛南浦  
雲朱簾暮捲西山  
雨閑雲潭影日悠  
悠物換星移度幾  
秋閣中帝子今何  
在檻外長江空自  
流



江南弄

江南弄巫山連楚夢行雲幾相送  
瑤軒金谷上春時玉童仙女無見期  
紫露香煙眇難託清風明月遙相思  
相思草徒綠爲聽雙飛鳳凰曲  
五言律詩

聖泉宴

襟乘石磴列籍俯春泉蘭氣熏山酌  
松聲韻絃影飄垂葉外香度落花前  
興洽林塘晚重巖起夕烟

尋道觀

枝屨光分野蓬闕盛規模碧壇清柱  
闕丹洞蕭松樞玉笈三山記金箱五  
嶽圖蒼虬不可得空望白雲備

散關晨度

關山凌旦開石路無塵埃白馬高譚  
去青牛真氣來重門臨巨壑連棟起  
崇隈即今揚策度非是棄繻回

別薛華

送送多窮路遑遑獨問津悲涼千里  
道悽斷百年身心事同漂泊生涯共  
苦辛無論去與住俱



是夢中人

重別薛華

明月沉珠浦，秋風濯錦川。  
樓臺臨絕岸，洲渚亘長天。  
旅泊成千里，棲遑共百年。  
窮途唯有淚，還望獨潸然。

遊梵宇三覺寺

杏閣披青磴，瑤臺控紫岑。  
葉齊山路狹，花積野壇深。  
蘿幌棲禪影，松門聽梵音。  
遽忻陪妙躅，延賞滌煩襟。

麻平晚行

百年懷土望千里，倦遊情高低。  
尋戍道遠近，聽泉聲礧葉纔分色。  
山花不辨名，羈心何處盡。  
風急暮後清。

送盧主簿

窮途非所恨，虛室自相依。  
城闕居年滿，琴尊俗事稀。  
開襟方未已，分袂忽多違。  
東巖富松竹，歲暮幸同歸。

餞韋兵曹

征驂臨野吹，別袂慘江垂。  
川霽浮烟斂，山明落照移。  
鷹風凋晚葉，蟬露泣秋枝。  
亭臯分遠望，延



想間雲涯

白下驛餞唐少府

下驛窮交日昌亭旅食年相知何用早懷抱即  
依然浦樓低晚照鄉路隔風烟去去如何道長  
安在日邊

杜少府之任蜀州

城闕輔三秦風烟望五津與君離別意同是宦  
游人海内存知己天涯若比隣無爲在岐路兒  
女共霑巾

仲春郊外

東園垂柳徑西堰落花津物色連三月風光絕  
四隣鳥飛村覺曙魚戲水知春初晴山院裏何  
處染鶯塵

郊興

空園歌獨酌春日賦閒居澤蘭侵小徑河柳覆  
長渠雨去花光濕風歸葉影踈山人不惜醉唯  
畏綠尊虛

郊園即事

煙霞春早賞松竹故年心斷山疑畫障縣溜瀉  
鳴琴草徧南亭合花開北院深閒居饒酒賦隨



興欲抽簪

觀佛跡寺

蓮座神容儼松崖聖跡餘年長金跡淺地久石  
文跡頽華臨曲磴傾影赴前除共嗟陵谷遠俄  
視化城虛

山居晚眺贈王道士

金壇踈俗宇玉洞似仙群花枝棲晚露峯葉度  
晴雲斜照移山影迴沙擁籀文琴尊方待興竹  
樹已迎暉

八仙逕

柰園欣八正松巖訪九仙援蘿窺霧術攀桂俯  
雲煙代北鸞驂至遼西鶴騎旋終希脫塵網連  
翼下芝田

春日還郊

閑情兼嘿嘿攜杖赴巖泉草綠縈新帶榆青綴  
古錢魚牀侵岸水鳥路入山烟還題平子賦花  
樹滿春田

對酒

投簪下山閣携酒對河梁狹水牽長鏡高花送  
斷香繁鷺歌似曲踈蝶舞成行自然催一醉非



但閱年光

觀內懷仙

玉架殘書隱金壇舊跡迷牽花尋紫澗步葉下  
清谿瓊漿猶類乳石髓尚如泥自能成羽翼何  
必仰雲梯

秋日別王長史

別路餘千里深恩重百年正悲西候日更動北  
梁篇野色籠寒霧山光歛暮烟終知難再奉懷  
德自潜然

上巳浮江宴韻得遙字

上巳年光促中川興緒遙綠齊山葉滿紅洩片  
花銷泉聲喧後澗虹影照前橋遽悲春望遠江  
路積波潮

長柳

晨征犯煙磴夕憇在雲關晚風清近壑新月照  
澄灣郊童樵唱返津叟釣歌還客行無與晤賴  
此釋愁顏

銅雀妓二首

金鳳隣銅雀漳河望鄴城君王無處所臺榭若  
平生舞席紛何就歌梁儼未傾西陵松檟冷誰



見綺羅情

妾本深宮妓層城閉九重君王歡愛盡歌舞爲誰容錦衾不復襲羅衣誰再縫高臺西北望流涕向青松

羈遊餞別

客心懸隴路遊子倦江干槿豐朝砌靜篠密夜窻寒琴聲銷別恨風景駐離歡寧竟山川遠悠悠旅思難

易陽早發

飭裝侵曉月奔策候殘星危閣尋丹嶂回梁屬

翠屏雲間迷樹影霧裏失峯形復此涼颺至空山飛夜螢

焦岸早行和陸四

侵星違旅館乘月戒征儔複嶂迷晴色虛巖辨暗流猿吟山漏曉螢散野風秋故人渺何際鄉關雲霧浮

深灣夜宿

主人依山帶江

津塗臨巨壑村宇架危岑堰絕灘聲隱峯交樹影深江童暮理楫山女夜調砧此時故鄉遠寧知遊子心



傷裴錄事喪子

蘭堦霜候早松露空臺深魄散珠胎沒芳銷玉  
樹沉露文晞宿草烟照慘平林芝焚空歎息流  
恨滿籛金

五言排律

泥谿

弭棹凌奔壑低鞭躡峻岐江濤出岸險峯磴入  
雲危溜急船文亂巖斜騎影移水烟籠翠渚山  
照落丹崖風生蘋浦葉露泣竹潭枝泛水雖云  
美勞歌誰復知

三月曲水宴

得烟字

彭澤官初去河陽賦始傳田園歸舊國詩酒間  
長筵列室窺丹洞分樓瞰紫烟縈迴亘津渡出  
沒控郊鄜鳳琴調上客龍轡儼群仙松石偏宜  
古藤蘿不記年重簷交密樹複磴擁危泉抗石  
晞南嶺乘沙眇北川傳巖來築處磻谿入釣前  
日斜真趣遠幽思夢涼蟬

秋日仙遊觀贈道士

石圖分帝宇銀牒洞靈宮迴丹縈岫室復翠上  
巖櫳霧濃金竈靜雲暗玉壇空野花常捧露山



葉自吟風林泉明月在詩酒故人同待余逢石  
髓從爾命飛鴻

五言絕句

晚留鳳州

寶雞辭舊役仙鳳歷遺墟去此近城闕青山明  
月初

羈春

客心千里倦春事一朝歸還傷北園裏重見落  
花飛

林塘懷友

芳屏畫春草仙杼織朝霞何如山水路對面即  
飛花

山扉夜坐

抱琴開野室攜酒對情人林塘花月下別似一  
家春

春莊

山春蘭葉徑城外李桃園豈知人事靜不覺鳥  
聲喧

春遊

客念紛無極春淚倍成行今朝花樹下不覺戀



年光

春園

山泉兩處晚花柳一園春還持千日醉共作百年人

林泉獨飲

丘壑經塗賞花柳遇時春相逢今不醉物色自輕人

登城春望

物外山川近晴初景靄新芳郊花柳遍何處不宜春

他鄉叙興

纓葉歸煙晚乘花落照春邊城琴酒處俱是越鄉人

夜興

野煙含夕渚山月照秋林還將中散興來偶步  
兵琴

臨江二首

泛泛東流水飛飛北上塵歸驂將別棹俱是倦遊人

去驂嘶別路歸棹隱寒洲江臯木葉下應想故



城秋

江亭夜月送別二首

江送巴南水山橫塞北雲津亭秋月夜誰見泣

離群

亂烟籠碧砌飛月向南端寂寂離亭掩江山此夜寒

別人四首

久客逢餘閏他鄉別故人自然堪下淚誰忍望征塵

江上風煙積山幽雲霧多送君南浦外還望將

如何

桂輶雖不駐蘭筵幸未開林塘風月賞還待故人來

霜華淨天末霧色籠江際客子常畏人何爲久留滯

贈李十四四首

野客思茅宇山人愛竹林琴樽唯待處風月自相尋

小徑徧宜草空庭不厭花平生誰與酒自得會仙家



亂竹開三徑，飛花滿四隣。從來揚子宅，別有尚  
玄人。

風筵調桂軫，月徑引藤杯。直當花院裏，書齋望  
曉開。

早春野望

江曠春潮白，山長曉岫青。他鄉臨睨極，花柳映  
邊亭。

山中

長江悲已滯，萬里念將歸。况屬高風晚，山山黃  
葉飛。

冬郊行望

桂密巖花白，梨疎林葉紅。江臯寒望盡，歸念斷  
征蓬。

寒夜思友三首

久別侵懷抱，他鄉變容色。月下調鳴琴，相思此  
何極。

雲間征思斷，月下歸愁切。鴻鴈西南飛，如何故  
人別。

朝朝翠山下，夜夜蒼江曲。復此遙相思，清樽湛  
芳綠。



始平晚息

觀闕長安近江山蜀路賒客行朝復夕無處是  
鄉家

扶風晝留離京浸遠

帝里金莖去扶風石柱來山川殊未已行路方  
悠哉

普安建陰題壁

江漢深無極梁岷不可攀山川雲霧裏遊子幾  
時還

九日

九日重陽節開門有菊花不知來送酒若箇是

陶家

七言絕句

秋江送別二首

早是他鄉值早秋江亭明月帶江流已覺逝川  
傷別念復看津樹隱離舟  
歸舟歸騎儼成行江南江北互相望誰謂波瀾  
纔一水已覺山川是兩鄉

蜀中九日

九月九日望鄉臺他席他鄉送客杯人情已厭



南中苦鴻鴈那從北地來

寒夜懷友雜體二首

北山煙霧始茫茫南津霜月正蒼蒼秋深客思  
紛無已復值征鴻中夜起

複閣重樓向浦開秋風明月度江來故人故情  
懷故宴相望相思不相見

王勃集卷下